

USORO BELSHAZZAR

Daniel 5:1-31.

OYOHU UKPEP-NKPO 422

Eke Ikpọ Owo

IKO IBUOT: “Emedomo fi ke balance; enyuñ ekut ete ke afo ukemke” (Daniel 5:27).

I Esabare Edisana Mkpoduoho Jehovah

- 1 Ke adaña emi Belshazzar ama akakpa mmin, enye ọnọ uyo ete ekeda edisana mkpoduoho ekama enam nkpo, Daniel 5:1-3; 2 Chronicles 36:7.
- 2 Esabare mme mkpoduoho emi ke ndida mmọ nñwọn mmin nnyuñ nkọm mme nsu-nsu abasi mmọ, Daniel 5:4.

II Ubọk-nwede ke Ibibene

- 1 Ekikere otimere edidem ke ntak ubọk-nwede emi, Daniel 5:5, 6.
- 2 Mme ofiok-nkpọ owo Babylon ikekemeke ndikọt, Daniel 5:7-9; Isaiah 44:25.

III Daniel Akabare Ubọk-nwede; Mkpa Belshazzar

- 1 Ọbọn-añwan eti Daniel, Daniel 5:10-12.
- 2 Eda Daniel eduk edi ke iso edidem, Daniel 5:13-16.
- 3 Daniel asua ọnọ edidem, Daniel 5:17-24.
- 4 Daniel akabare ubọk-nwede oro, Daniel 5:25-28.
- 5 Ekpono Daniel, ewot Belshazzar, ndien Darius ada ubọn, Daniel 5:29-31.

SE EKPEPDE EBAÑA

Mme Nwede

Ke adaña emi usen ebede, utọ usen oro ikemeke ndifiak ndi. Kpukpru se ibañade utọ usen oro ebe oduk nsinsi-ini. John etiñ ọnọ nnyin ke Nwede Eriyarare ete ke Abasi okonyime imọ ikut ini emi Abasi editiede ke ebekpo ubierikpe. Ke iso Esie, ema ebon kpukpru mme idut. Mkpa ye obio-ekpo ema enyuñ esana mme akpa-mkpa mmọ eyak man eda ke iso akwa Esop ubierikpe ebọ nnen-nnen ubierikpe mmọ. John ama etiñ ete ke ema ekubọre mme nwede. Ndien mbuk ke abaña mme uwem owo edu ke mme nwede emi. Se ewetde esin ke nwede oro edi se edade ekpe ikpe kpukpru owo.

Nwede Daniel ibuot ition etiñ mbuk abaña owo emi ekemenerede esit esie ke enyọn onyuñ atuaha ye anana-utit Abasi, Abasi emi okodudedu kpukpru ini, edinyuñ odude kpukpru ini, emi ọdiọñode utit toto ke eritọñ, emi odude ke nsan-nsan ọdiọñ ndibe-ndibe ekikere nnyin, emi kpukpru nkpo anade iferi ye ata iñwañ-iñwañ ke enyin Enye emi nnyin isañade nkpo ye Enye. Andiwet Psalm ewet ete “Ami nkeme ndika mmọn mkpọn Spirit fo? Ndifehe nka mmọn mbọhọ iso fo?” Odu enyin eke esede nnyin, ndien kpukpru se anamde ewet enim ke Heaven.

Babylon

Ukara Belshazzar, edi enye emi ọkọwọrọde etop ke ofuri ererimbot. Mbuk anam efiok ete ke ukara mbon Chaldea ama atara osim kpukpru mme idut ererimbot emi ekefiokde ke ini oro. Ndien ke ini Belshazzar akadade ubọn, ubọn Babylon ama ọdọk okosim ata akamba idaha. Edi Abasi ama ọdọhọ ete ke eyesuhọre nkoñ-nkoñ idaha Babylon enim ke isoñ. “Nti ido efori obio: edi idiok ido esin obio enyene but.”

Ebiet Ukpeme Belshazzar

Belshazzar edidem akanam akwa usoro ke ediye akamba itak obio ukara emi okodude ke Babylon. Enye ọkọdọn ekot tọsin ikpo owo esie onyuñ ọnwọn wine ke iso tọsin oro. Enye ama ọdiọñ ete ke

Media ye Persia edu ke edem ibibene obio. Enye obure mbure onyũ asak uduak mme asua ndikere ete ke mbon-ekõn mmimõ emekeme ndibuñ ibibene emi akakande akwa obio Babylon nnyũ mbe nduk. Ndisuk Belshazzar ye mbõn esie ekekere ete ke mmimõ imenyene akamba ukpeme ke okoneyo oro. Ke eyo oro, obio emi ekedide ibuot õnõ kpukpru mme obio ke ererimbot ini oro ekedi Babylon, akamba obio emi ekenyenede ubõn ke ini eset oro, emi ekenyenede enyĩn ye etop emi obio efen ke mbuk ofuri emana mikenyeneke.

Mme ewet-ñwed ñkpõ-ntibe ke ini eset oro enam efiõk ete ibibene emi uniõn esie ekedide ikpat 300 ye ubom esie ekedide ikpat anañ ama akan Babylon okuk, ndien ke ekeme ndidi mmõ ema enyene eti ukara ye nti mbon-ukpeme obio; edi iduhe ibibene eke okoñde me ubom esie onyũ okponde akaha, me ukara eke õfõnde akaha tutu osim idaha emi mikemeke ndiduõ, me ukara esie ndiwure ke ini Abasi adahade ada ndinyeñe ibibene oro nnyũ ñwuri ukara oro.

“Koro miwarake ndinõ idiõk owo ufen, oro esin nditõ owo esõn esit ke idem mmõ enam idiõk” (Ecclesiastes 8:11).

Mbio Emi Esinde Abasi

Belshazzar ikõyuhõke ke idiõk usõrõ esie ye ediwut idem esie nte enye emi enyenede ukpono ye odudu. Enye okoyom ndiwut mme owo ete ke imõ inimke Abasi Israel ke akpanikõ. Emi edi se ediwak owo enamde mfin emi. Mmõ edomo ndiwut nte “imõfiõk ñkpõ ikaha” enyũ esin Abasi ye edu-ukpono Abasi eyo-oko. Idem mfin emi, mme õkwõrõ-ikõ Abasi ke ekakañ idaha Jesus nte eyen Abasi. Ke okoneyo oro, Belshazzar okoyom ndimenere idemesie ñkan edisana Abasi, ndien edinam esie ama ada nsobo ye isuñi õsõk enye. Usõrõ emi õkõyõhõ ye idara; edi Abasi akayak enye õnõ usuñ esie tutu enye anam akan nte enye akpakanamde ke idiõk usuñ onyũ edue.

Enye ama eti abañã eme (gold) ye sidibe (silver), ye ndisana mkpoduho Abasi emi ete esie Nebuchadnezzar akatañde osioñõ ke Itie-ukpono Abasi ke Jerusalem. Enye ama õdõhõ eda mmõ edi, ndien enye añwaña wine õdõn tutu õyõhõ onyũ õnõ mme mbõn ye iban mmõ; ndien kpukpru mmõ eñwõn wine ke ndisana mkpoduho Jehovah. Mmõ ekõm mme abasi emi edade eme, sidibe, itiat ye eto enam— kpukpru mme abasi ke mibõhõke ata Abasi.

Ubõk-ñwed

Ke ndo-ndo oro nnuen-ubõk owo õwõrõ ediwet ke ndom ibibene ke enyõn edem utuenikañ. Ubõk aka iso ewet ñwed. Iso edidem akabare akpai; edõn esie kiet onyũ atuak eken. Enye okot mbia-mfa, mbia-idiõn ye mme õfiõk ñkpõ owo Chaldee esie ekuk edi man mmõ edikot ubõk-ñwed emi; edi baba owo kiet ke otu mmõ ikekemeke ndifiõk ubõk-ñwed Abasi ke ibibene.

Edieke ubõk-ñwed ikpõn ke ibibene emi eketiñde abañã nsobo owo eketimerede esit Belshazzar ntem, editie didie ndida ke iso akpatre Ebekpo ubierikpe man eyarade mme ñkpõ ke uwem nnyin? Owo kiet ke otu mme ewet-ñwed ke Ñwed Abasi eti nnyin abañã emi: “Edieke esit nnyin obiomde nnyin ikpe, Abasi okpon akan esit nnyin.” Enye eyebiom nnyin ikpe akan nte esit nnyin obiomde nnyin ke ini iduede. Edidi enyene-ndik ñkpõ ñdida ye uwem idiõk-ñkpõ ke iso Ebekpo Ubierikpe!

Ke akpatre, ke ntak uyom, ndutime ye akwa mkpaidem emi akakarade do, õbõn-añwan ama oduk ke ufõk-usõrõ. Enye ama etiñ ete ke owo kiet odu ke obio esie emi Spirit Abasi odude enye ke idem, ndien ke eyo Nebuchadnezzar ke enye ama ekeme nditat mkpõsõn ikõ. Edieke ekotde Daniel, ke enye eyekeme ndisiak ubõk-ñwed ke ibibene. Daniel ama oduk edi ke ufõk-usõrõ onyũ õdõhõ edidem ete: “Afo, o edidem, Abasi Ibom ama õnõ Nebuchadnezzar usõ ubõn ye ubom ye ukpono ye uyai: . . . Ndien ke ini enye emenerede esit esie ke enyõn, Spirit esie onyũ akabarede õsõn, onyũ eseride iseri, esio enye ke ebekpo ubõn esie esuhõre, enyũ ebõ enye ukpono esie efep: . . . Ndien afo, o Belshazzar, eyen esie ukõsuhõkede esit fo unim, koro afo õfiõkde kpukpru ñkpõ emi” (Daniel 5:18-22). Ebighi adaña didie mme owo ndibõ ukpep-ñkpõ ke ini Abasi anamde ñkpõ ye mmõ me ndinyũ nnyene ifiõk ke ini ñkpõ otibede õnõ mbon efen! Akpana nte owo kiet-kiet enyene ifiõk õnõ idem esie ke abañã ukpep-ñkpõ emi. Enye iyuhõke ke ndibõ ukpep-ñkpõ ke ini Abasi amiade owo efen ufen.

“Eyen mi ti’ ekedi mme ikọ oro Abraham eketiñde ọnọ owo inyene oro okodude ke hell. Edieke mme owo ekpepepe mme mbuk nkpo-ntibe, ese ete utit uwem mmọ ekpetie didie!

Emedomo, Enyuñ Ekut Ete Ikemke

Daniel ama okot ubok-ñwed onyuñ akabare enye. Enye ama etiñ ọnọ mmọ ete ke emebahare ubon edidem enyuñ emen enye enọ Medes ye Persia. Enye ọdọhọ Belshazzar ete, “Emedomo fi ke udomo-ñkpọ; enyuñ ekut ete ke afo ukemke”. Mbon emi ewetde nkpo ebaña ñwed nkpo-ntibe etiñ ete ke mbon Medes ekenam inyañ Euphrates ọkpọñ usuñ emi enye akasañade akabare asaña ke usuñ efen ndien mmọ esaña ke ison inyañ emi ebe esaña ke idak ibibene eduk ke esit obio. Mmọ ndien edisim mbon-ukpeme obio ke ini mmọ mikebeñeke idem, mmọ ndien emum mbon-ekon emi ekedade ekpeme, eñwana enyuñ ebiat akwa obio oro. Belshazzar ikakam ikopkekop mbuk nsobo esie ima ke inua Daniel ke ini enye okopde uyo mkpo etiñde ete ke mbon Medes ye Persia eduk obio esie. Ke okoneyo oro ukpọñ okpono-ndem ye idiok edidem emi ama aka ndisobo ye iyaresit Abasi emi enye ekesinde ke ndek.

Ñwed Abasi ọdọhọ nnyin ete “Ekuyak ebiaña mbufo; owo ikemeke ndibiaña Abasi: se ededi owo ọtode, oro ke enye edinyuñ ọdok” kpukpru nkpo eke abañade idem nnyin edi se ewetde enim. Ke ini Abasi edisinede ọfon nsinsi iyaresit esie, onyuñ etiede ke ebekpo Esie, mme owo eyesobo ye enyin emi asakde nte ikañ man mmọ enọ mbuk ebaña idem mmọ nte mmọ ekedude uwem ke ererimbot emi.

Nso ikotibe inọ obio Babylon? Mfin emi obio emi edi ebiet eke mme oyit ye emiañ eduñode. Edi mme nkpri obot ifañ ke ekeme ndikut ke akwa obio emi. Ukara mbon Chaldee ama ebe efep. Inamke nkpo, obio okpokop odudu nte ededi; enye ekeme ndinyene mbon-ekon eke eñwanade ke mmọñ ye ke obot; edi ke ini Abasi onode uyo abaña utit esie, enye eyeduo.

Nsinsi-ini

Nnyin ke isasaña ika nsinsi ebiet-iduñ nnyin, oro edi ke mbeñe-idem me ke unana mbeñe-idem, ke eti me idiok. Edieke afo mubohọ erinyaña, me afiakde edem ọkpọñ Abasi, edieke nkpo odude eke anamde afo munyeneke erikan, afo eyeda ke iso Abasi ye ubiom-ikpe. Edieke nkpo odudukde esit fo, ndien afo ayak oruñ eke edide ndot-ndot otibe ke esit fo, ti ete ke enye eyesobo ye afo ke nsinsi ebiet-iduñ. Ekeme ndidi afo amakama “Oruñ eke edide ndot-ndot” oro edi ke ufok Abasi ndien onyuñ ọtọñ ntak obiom enye ada ọnyon ufok, edi kpukpru mme edinam ke edu edikpono Abasi emi afo asañade ebe ke esit ididaha emem inọ esit fo ibohoke eda odudu emi odude ke Iyip emi ọkọduhode ke Calvary esio ndot-ndot oruñ oro efep, oto ke edinam edisana Spirit Abasi.

Emedomo ke udomo-ñkpọ enyuñ ekut ete ke ukemke,” ada owo okosim ke nsinsi ebiet kpa ebiet emi ñwed usen ọfiñ miduhe, me ñkanika ufiok ini minyuñ iduhe ke ibibene. Enyene ndik didie ke abaña utit uwem utọ mbon oro esañade ebe ke ññwaña usuñ nsobo emi! Mmọ ididaha isua million duop isaña ikpere akpatre nsobo mmọ. “Tim idem man osobo ye Abasi fo.”

MME MBUME

- 1 Siak mme ini mme ini emi ekekotde Daniel man enye edikabare mme ndap.
- 2 Tiñ baña nte usoro Belshazzar eketiede.
- 3 Nso ikotibe inọ edidem ke ini enye okutde ubok ke ibibene?
- 4 Anie eketiñ ọnọ edidem abaña Daniel?
- 5 Daniel eketi edidem abaña nso nkpo?
- 6 Nso ke Daniel eketiñ ete ke edidem anam edue?
- 7 Nso nkpo ke Abasi ekewet ke ibibene?
- 8 Ini ewe ke ekewot Belshazzar?
- 9 Anie akada ukara obio emi akama?
- 10 Nso ukpẹ-ñkpọ ke afo enyene abaña mbuk emi?

